

cion. Esloigne-toy deux, perseuere & attends, ils attendent l'occasion de te maltraiter, mais tu les verras chastier.

LE CHAPITRE DES BANDES

& Troupes des gens de Guerre, contenant

quatre-vingts-sept versets, escrit

à la Medine.

AV nom de Dieu clement & misericordieux. O Prophete! crains Dieu, & n'obey pas aux infidelles, Dieu sçait tout & est tres-prudent en ce qu'il ordonne, obserue ce que ton Seigneur t'a enseigné, il sçait ce que les hommes font, resigne toy en Dieu, il te doit suffire qu'il te protege. Il n'a pas donné deux cœurs aux hommes, il ne nous a pas ordonné d'appeller vos femmes vos Meres, tous ceux que vous appelez vos enfans ne sont pas vos enfans, vous le diés seulement de bouche, mais Dieu diét toujours la verité, & conduit les hommes au chemin de salut. Appelez vostre prochain par le nom de son pere, cette action sera agreable à Dieu, pourueu que vous n'ayez point de mauuais dessein dans le cœur, si vous ne sçauéz pas son nom appelez-le vostre frere en Dieu, où Monsieur, Dieu est clement & misericordieux. Le Prophete est obey par ceux qui croient en Dieu, & qui honorent ses femmes

comme leurs meres. Les parens sont heritiers les vns des autres, il est ainsi ordonné par la diuine Majesté aux fidelles qui sont sortis de la Meque pour suiure le Prophete: Il est ordonné en l'escriture de faire du bien à vos parens. Souuiens toy que nous auons receu la promesse des Prophetes de Toy, de Noé, d'Abraham, de Moise, & de Iesus fils de Marie (d'adorer vn seul Dieu) nous en auons receu vne forte promesse: On leur demandera compte de leurs actions, & les impies sentiront la rigueur des peines infinies. O vous qui croyez en Dieu, souuenez vous de la grace qu'il vous a faite lors que vous auez esté chargez par les troupes des ennemis, il a enuoyé contre eux vn vent impetueux, & des troupes inuisibles a vos yeux pour les combattre, il void tout ce que vous faites, ces troupes inuisibles sont venuës du costé du Leuant, & du costé du Ponant, d'en bas & d'en hault, lors que vostre veüe estoit troublée & que le cœur vous manquoit à cause du grand nombre de vos ennemis, vous auiez desia conçu vne tres-mauuaise opinion de la loy de Dieu, alors les vray croyants ont esté esprouuez, ils ont tremblé de peur; les impies & ceux qui estoient foibles en leur foy ont dict que tout ce que Dieu & son Prophete leur auoit promis n'estoit qu'abus & vanité; Souuiens toy comme vne partie d'entre-eux a dit aux habitans du Terroir de la Medine, il n'y'a point de seureté pour vous auprez de Mahomet, retournez en vos maisons; Souuiens toy comme plusieurs d'entre-eux,

t'ont demandé congé, & ont dit que leurs maisons estoient abandonnées: Leurs maisons n'estoient pas abandonnées, mais ils auoient dessein de fuir; s'ils fussent retournez en leurs maisons, on leur auroit persuadé de tous costez de suiure l'impieté, ils n'y auroient pas fait long sejour, parce qu'ils auoient auparauant promis à Dieu de ne pas fuir, il leur auroit demandé compte de leurs promesses: Dis leur, la fuite vous sera inutile si vous fuyez la mort, puisque vous ne deuez guere demeurer dans le monde; Dis leur, qui vous peut proteger contre Dieu lors qu'il voudra vous exterminer? ne prenez point d'autre protecteur que luy; il cognoit ceux qui ont esté dissuadez d'aller au combat pour espargner leurs biens, & leurs personnes; Ils iettent la veüe sur toy lors qu'ils sont surpris de peur, ils tournent les yeux dans la teste comme vne personne qui se meurt, & lors qu'ils sont deliurez de peur, ils medisent de toy à cause de leur extreme auarice. Telles gens ne croyent pas en Dieu, il rend toutes leurs œuures infructueuses, c'est chose tres-facile à sa diuine Maiesté. Les troupes des Infideles ont creu qu'elles estoient inuincibles, & lors qu'elles ont veu les troupes des vray croyants, elles ont souhaité de fuyr. Les Infideles ont desiré d'attirer les Arabes à leur party, & s'informent de vos nouvelles pour sçauoir en quel estat vous estes, s'ils auoient esté de vostre party peu d'entr'eux auroient esté tuez, la suite du Prophete Apostre de Dieu vous sert de citadelle, elle sert de bouleuart à ceux qui ap-

prendent le iour du iugement, & qui pensent sou-
 uent en sa diuine Maieité. Lors que les fidelles ont
 dit, voila ce que Dieu & son Prophete nous ont pro-
 mis, ils sont veritables en leurs promesses, la veüe de
 leurs ennemis a augmenté leur foy & leur zele en-
 uers Dieu, & son Prophete. Il y à des personnes en-
 tre les vray-croyants qui ont effectué ce qu'ils ont
 promis à Dieu, plusieurs d'entr'eux sont morts en
 l'obeyssance des commandemens de sa diuine Maie-
 sté, les autres attendent la mesme chose, & ne cõtre-
 uiennent pas à ce qu'ils ont promis, Dieu les recõpen-
 sera de leur zele, & chastiera les infidèles ou leur par-
 donnera si bon luy sèble; il est clement & misericor-
 dieux. Dieu exterminera les infidèles avec leur colere
 contre les fidelles, il protege les vray-croyants dans
 les cõbats, il est fort & tout puissant. Les Iuifs sont
 descendus de leur forteresse pour donner secours aux
 infidèles, mais Dieu a ietté la peur dans leur cõeur,
 vne partie a esté tuée, & l'autre a esté prise esclau, ils
 vous ont fait par leur mort heritiers de leur pays, de
 leurs maisons, de leurs richesses, & de leurs forteres-
 ses, que vous ne pouuez pas conquerir; Dieu est tout
 puissant. O Prophete si tes femmes sont trop ambi-
 tieuses des biens de la terre, & de vestemens trop
 somptueux, appelez les; dis leur que tu leur feras du
 bien, & que tu les repudieras avec douceur & ciuilité.
 Si elles ayment Dieu & son Prophete, si elles sont
 vertueuses, sa diuine Maieité leur donnera vne tres-
 grande recompense: O femmes du Prophete, celles

d'entre vous qui seront impudiques seront châtiées doublement plus que les autres femmes, c'est vne chose facile à Dieu, celles d'entre vous qui obeyront à Dieu & à son Prophete, & feront de bonnes œures seront recompensées plus que les autres femmes, on vous a préparé vne tres-grande recompense; O femmes du Prophete, vous n'estes pas comme les autres femmes du monde, craignez Dieu & ne croyez pas au discours de ceux qui ont dessein de vous seduire, parlez avec ciuilité, demeurez dans vos maisons, n'en sortez pas pour faire paroistre vostre beauté, & pour en faire monstre comme faisoient les anciens ignorants, priez Dieu avec affection, faites des aumosnes, obeysses à Dieu à son Prophete, Dieu vous veut deliurer de sa colere, & vous veut purifier, souuenez vous de la loy qu'on vous a enseignee dans vos maisons, il est misericordieux à ceux qui l'honnorent, il sçait tout ce que le Prophete fait, il a promis sa misericorde, & vne tres-grande recompense à ceux & à celles qui obeyront à ses commandemens. Ceux & celles qui croient en son vnité, qui se resignent à sa diuine volonté, qui sont patiens, qui sont humbles, qui disent la verite, qui ieusnent, qui font des aumosnes, qui sont chastes, & les hommes & les femmes qui obseruent sa loy, ne doiuent pas controller ses actions, ny celles de son Prophete, ny dire qu'ils feroient mieux qu'eux s'ils vouloient trauailler; celui qui desobey à Dieu & à son Prophete est deuoyé du droict chemin; Sou-

viens toy de ce que tu as dit à celuy a qui Dieu a fait la grace de le recevoir dans sa loy, & que tu as gratifié de la liberté, que tu as dit, ne repudie pas ta femme, & crains Dieu, tu cache en ton ame vn dessein que Dieu manifestera, tu as peur du peuple, mais tu

Mahomet fut amoureux de la femme de Zeid son esclave, il la luy fit repudier pour l'espouser à cause de sa beauté.

Il n'est pas le pere de Zeid pour ne pas espouser la femme qui la repudiee. Voy Tesfir ans iouhir.

ne dois craindre qu'un seul Dieu. Lors que Zeid a repudié sa femme, nous t'avons marié avec elle, afin qu'il ne reste point d'erreur entre les vray-croyans, lors qu'ils auront repudié leurs femmes, ils observeront en les repudiant ce que Dieu a ordonné. Le Prophete ne peche pas de faire ce que Dieu luy a permis, la loy de Dieu a esté ainsi observée par ceux qui nous ont précédé & le commandement de sa divine Majesté s'exécute sans retardement; Ceux qui preschent la parole de Dieu, les Apostres & les Prophetes n'ont peur de personne que de sa divine Majesté, il leur suffit qu'ils soient en sa protection. Mahomet n'est pas vostre pere, il est Apostle de Dieu & le dernier de tous les Prophetes, Dieu sçait tout, il ne viendra point d'autre Prophete apres luy. O vous qui croyez en Dieu, pensez souvent en sa divine Majesté, louez le soir & matin, il vous donnera sa misericorde, les Anges demanderont pardon afin qu'il vous delivre des tenebres; il est misericordieux aux vray-croyans, les Anges les salueront de sa part au jour du jugement, il leur a préparé vne tres-grande recompense. O Prophete, nous t'avons enuoyé pour estre tesmoin des deportemens du peuple, & comme lumiere pour les conduire au droict chemin, annonce aux vray-croyans qu'ils re-

ceuront

teuront de ton Seigneur vne tres-grande grace; N'obeis pas aux infidelles ny aux meschans, ne crains pas leur malice, & te confie en Dieu, tu dois estre satisfait que Dieu te protege. O vous qui croyez, il ne vous est pas permis de mal traiter vos femmes; Si vous les repudiez auant que de les cognoistre, faites leur du bien, & les repudiez avec douceur & ciuilité: O Prophete, nous te permettons de cognoistre les femmes que tu as dottée, les filles esclaves que Dieu t'a données, les filles de tes oncles, & de tes tantes qui ont abandonné avec toy de la compagnie des meschans, & la femme vray-croyante qui se sera donné à toy, si tu l'a veu espouser, & qu'elle ne soit pas femme d'un vray-croyant; Nous scauons ce que nous auons ordonné aux vray-croyans touchant leurs femmes & leurs esclaves, nous te l'auons enseigné, afin que tu n'offense pas Dieu, il est clement & misericordieux à ceux qui luy obeissent. Tu garderas celles que tu voudras garder de tes femmes, tu repudieras celles que tu voudras repudier, & coucheras avec celles qui t'agréeront, il est plus à propos que tu les repudie sans offenser Dieu, que de les voir mal contentes & affligées, elles se contenteront du bien que tu leur feras en les repudiant, Dieu scait ce qui est en vos cœurs, il scait tout & est tres-misericordieux. Il ne t'est pas permis de cognoistre autres femmes que les tiennes, il ne t'est pas permis de les troquer encore que la beauté des autres t'agréé, excepté tes esclaves, Dieu prend garde à tout. O vous

*Mahomet
auoit neuf
femmes.
Voy Ge-
ladin.*

qui croyez ; n'entrez pas dans les maisons du Prophete sans permission, excepté à l'heure du repas, & ce, par rencontre & sans dessein, si vous y estes invitez entrez avec liberté, lors que vous aurez pris vostre repas sortez de la maison, & ne vous arrestez pas à discourir les vns avec les autres, cela importune le Prophete, il a honte de vous congédier, mais Dieu n'a pas honte de vous dire la verité. Les femmes du Prophete auront le visage couuert lors que vous parlerez à elles, cela ressent mieux sa pureté, tant à elles qu'à vous; Vous ne devez pas importuner le Prophete de Dieu, & ne devez pas cognoistre les femmes, ce seroit vn tres-enorme peché, si vous couuez quelque dessein, ou si vous le decouuez, sçachez que Dieu sçait tout; elles n'offenseront pas Dieu de se faire voir à leurs peres, à leurs enfans, à leurs freres, à leurs neveux, à leurs seruantes, & à leurs filles esclaves, elles craindront Dieu, il voit tout, Dieu & les Anges prient pour le Prophete; O vous qui croyez; priez pour le Prophete, & luy obeissez; celuy qui desplaira à Dieu & à son Prophete sera maudit en ce monde, & ressentira de rigoureuses peines en l'autre; Ceux qui font mal sans raison à ceux & à celles qui croient en Dieu, commettent vn tres-grand peché; O Prophete dis à tes femmes, à tes filles, & aux femmes des vray-croyas, qu'elles se couurent de leurs voiles, elles en seront plus honorées, & ne receuront point de deplaisir, Dieu est clement & misericordieux. Si les mes-

*Benissent
le Prophe-
te.*

*Voy Ge-
laldin.*

chians, les paillards, & ceux de la Medine qui sont foibles en leur foy, ne quittent leur impieté, ie te donneray pouuoir absolu sur eux, peu d'entr'eux te respecteront, mais prens les, & les tuë où tu les rencontreras, Dieu l'a ainsi ordonné à ceux qui t'ont precedé, tu ne trouueras point de changement en la loy de Dieu. Le peuple t'interrogera quand sera le iour du iugement, Dis leur, que Dieu seul le sçait, & que tu ne sçais pas s'il sera bien-toft, mais que Dieu a préparé pour les infidelles vn tres-grand brasier où ils brûleront eternellement, ils ne trouueront point de protection, ils seront renuersez la teste premiere dans le feu, & diront plûst à Dieu que nous eussions obey à sa diuine Majesté & à son Prophete son Apostres, ils diront, Seigneur nous auons obey à nos Maistres & à nos Superieurs, ils nous ont deuoyez du droict chemin, Seigneur chastie-les doublement, & leur donne ta malediction. O vous qui croyez, ne foyez pas comme ceux qui ont desplû à Moïse, il estoit innocent des crimes qu'ils luy imposoient, il estoit inspiré de Dieu, craignez Dieu & parlez avec ciuilité, vos ceuures luy seront agreables, & vous pardonnera vos pechez; Celuy sera heureux qui obeïra à Dieu, & à son Apostre, la fidelité & l'obeïssance luy sont agreables au Ciel & en la Terre & sur les montagnes; Ceux qui s'en esloignent comme a fait Adam, se font fait tort à eux-mesmes, & sont des ignorans, il chastiera ceux & celles qui seront desobeïssans &

impies, il donnera sa grace à ceux & à celles qui croiront en sa loy, il est clement & misericordieux à ceux qui luy obeïssent.

LE CHAPITRE DE SABA,
contenant cinquante-quatre versets,
escriit à la Meque.

AV nom de Dieu clement & misericordieux. Loué soit Dieu, tout ce qui est au Ciel & en la Terre est à luy. Louange luy est deuë, il est tres-sage & sçait tout, il sçait tout ce qui entre dans la terre & tout ce qui en sort, tout ce qui monte au Ciel, & tout ce qui en descend, il est clement & misericordieux à ses creatures. Lesimpies demandent s'ils verront le iour du iugement; Dis leur, qu'oüy, & que ton Seigneur en sçait le temps, il sçait le passé, le present & le futur, & tout ce qui est au Ciel & en la Terre, iusques à la pesanteur d'un atome, ce qui est encore plus petit, & ce qui est plus grand qu'un atome est escriit dans un liure qui explique toute chose, il recompensera les vray-croyans qui ont fait de bonnes œuures, il leur donnera sa misericorde, & les enrichira de precieux tresors; Ceux qui se sont efforcés de supprimer sa loy ressentiront les effets de son indignation; Ceux qui sçauent l'escriture cognoissent que ce que Dieu t'a enseigné est la verité mesme pour conduire le peu-

*Saba est
 une Pro-
 vince de
 Liemen.
 Voy Ge-
 laldin.*